

Pa desaroya proyecto fast ferry:

Intencion ta pa yega na un acuerdo entre Aruba, Curacao y posible operador

ORANJESTAD (AAN) – Den conferencia di prensa di gobierno, Dialuna mainta, Minister Chris Romero, siguiendo riba e tema di Fast Ferry, a menciona e deseo di yega na un acuerdo entre Aruba y Curacao.

Esaki ta un stap cu mester tuma lugar entre aki un pa dos luna, e dignatario a subraya.

E dignatario a señala cu for di 2016 e proyecto aki a bin dilanti y semper Curacao a brinda pe, pero Aruba a keda un banda e tempo ey. Aworaki, Gobierno tine como prioridad pa diversifica nos economia.

Anto, e siguiente paso ta yega na un acuerdo entre Aruba y Curacao, unda nan ta bay haci esaki un posibilidad.

E mandatario a splica cu Douane y Imigracion mester bay traha hopi



bon cu otro, y asina ey, yega na e stap cu por haci esaki bira realidad. Un bez cu yega na e acuerdo aki, den seis luna lo tin cu yega na un convenio entre Aruba, Curacao y e posible operador.

Minister Romero sa cu tin dos of tres operador hopi interesa den e proyecto aki. E no a menciona nomber ainda, pero ta asegura cu nan interes ta grandi. Esaki no ta di awor pero pa añanan

caba cu nan ta wak esaki factible. E mandatario a agrega cu gobierno kier yega por lo menos aki seis luna, na un acuerdo entre Aruba y Curacao y un di e posible operadornan. Un di e exigencianan ta cu e mester ta un compania priva, pa motibo cu e inversion no ta sali di nos pais. “Nos sa cu e situacion di Aruba no ta e di mihor aworaki, pero Curacao tampoco, y pesey mes nan ta prefera di yega na un acuerdo cu e operador mes pa desaroya e proyecto y asina ey yega na un consenso pa e operador yuda den e proyecto aki”, Minister Romero a subraya. El a agrega cu Aruba y sigur Curacao tin e prioridad pa yega na e acuerdo aki mirando e parti importante di husticia, pero despues pa purba den seis luna tin un acuerdo entre Aruba, Curacao y e posible operador.